

# Signalisaziun turistica per il patrimoni Sardona

In'acziun communabla dalla destinaziun turistica Flem/Laax e dil Patrimoni dalla Unesco dalla Arena tectonica Sardona

DA MARTIN CABALZAR

■ **Cun ina nova signalisaziun che figurescha sut la noziun «Regiun da patrimoni mundial Sardona» vul la destinaziun turistica da Flem/Laax render attent alla valur da quella cuntrada singulera ch'ei vegnida recepida el Patrimoni mundial dalla Unesco.** Sin las tablas piazzadas sper las vias e sendas da viandar denter Sagogn e Rehanau vegn rendiu attent a quella marca enconuschenta sigl'entir mund cun render attent allas valurs naturalas regiunalas che stattan connex culla formaziun da nossa cuntrada alpina. Tenor il meina-gestiun dalla Arena tectonica Sardona Harry Keel ei quei ina transformaziun exemplarica dil niev concept cantunal davart la signalisaziun turistica. Cooperau a quella acziun han ton ils responsabels dalla destinaziun turistica da Flem/Laax, dil Patrimoni mundial dalla Unesco sco era dalla marca «Graubünden».

## Nova signalisaziun turistica

Dapi entginas jamnas han ils automobilists che carreschan da Cuera silla via nazunala viers la Surselva engartau agl ur dalla via ina gronda tabla cul maletg dil Pèz Siat Dunschalas che renda attents alla «Regiun da patrimoni mundial Sardona».

Tenor ils responsabels dalla Flem Laax Falera Management SA ein sper quella tabla principala alla via nazunala uss era las tablas d'informaziun els vitgs dall'entira destinaziun turistica denter Tumein e Sagogn realisadas. «La signalisaziun unitara e cumpleta dalla destinaziun ei in pass impurtont che ha absorbau dabia temps», informescha Marc Woodtli veseivlamein cuntents. «Ins sa plidar da cletg che nus savein duvrar cul Patrimoni mundial dalla Unesco ina marca ch'ei enconuschenta sigl'entir mund e che selai applicar sut il logo «Regiun da patrimoni mundial Sardona» per l'entira destinaziun.

## Satisfatgs dalla signalisaziun nova

Satisfatgs dalla signalisaziun nova dalla Arena tectonica Sardona ei era Gieri Spescha, il gestiunari dalla marca «Graubünden»: «Ils responsabels dalla Arena tectonica Sardona han transformau ensemen cun Flem Laax Falera Turissem a moda exemplarica il niev concept cantunal per la signalisaziun turistica.» Las tablas d'informaziun postadas en loghens prominents informeschan visitaders potenzials davart il patrimoni mundial. Tras pliras tablas da signalisaziun vegnan els guidai entochen al pei dalla Arena tectonica Sardona a Flem. La finamira da quei concept da signalisaziun seigi da render attent a moda semplia ed efficienta a caussas turisticamein relevantas, di Spescha. Il concept da signalisaziun seba-si sillas directivas dalla marca «Graubünden».

Per il gestiunari dil Patrimoni mundiala dalla Unesco Harry Keel va in siemi en vigur culla signalisaziun nova. «Flem Laax Falera ei l'emprema destinaziun ord il perimenter dalla Arena tectonica Sardona che metta igl accent a moda aschi consequenta e cun perschasiun sil patrimoni mundial.» Quei ferm e clar confess en favur dil patrimoni procuri a quel per atenziun e consideraziun supplementara ed augmenti era sia reputaziun tier persunas ch'ei sensibilisadas per las bellezias naturalas, ei Keel perschadiu.

## Pavigliun da visitaders ed app Sardona

Ultra dalla signalisaziun sper via sa Flem Laax Falera Turissem era presentar ulteriuras novaziuns en connex cul patrimoni mundial. Il pavigliun da visitaders, postaus sper la camona da Segnes, ei vegnius frequentaus la stad vargada aschi frequentamein ch'el duei vegnir engrondu ed era esser accessibels duront igl entir onn. Ton el pavigliun sez sco a casa san ins plinavon scargar giu in app Sardona che intermediatescha numerusas scopertas ed aventuras ella natira ch'ins sa evenimentar sil Plaun da Segnes ni en ils con-



Il pavigliun d'informaziun sper la camona da Segnes ei frequentaus ordvart bein e duei perquei vegnir engrondu ed esser accessibels era igl unviern.

ARENA TECTONICA SARDONA

tuorns da Flem. Denter auter declara la muntaniala «Tektoni» a moda bein capeivla era per ils affons ils fenomenes geologics dalla ruttiva inversa dalla tectonica Sardona. Dil reminent ei igl app Sardona vegnius nominaus uonn per il Premi da design dalla Svizra.

## Patrimoni Sardona ella destinaziun turistica da Flem Laax Falera

Era ordeifer il perimenter per propi dil patrimoni mundial che cumpeggia el cantun Grischun igl intschess entuorn la cadeina da cuolms Bargis Crap da Flem-Plaun da Segnes-Siat Dunschalas ein ils elements dalla formaziun dalla cuntrada omnipresents. Els dattan era la tempru a quella cuntrada singulera. Las duas bovas da Flem e Tumein ein plinavon perdetgas marcantas e relativamein giuvnas dalla

formaziun dallas muntognas, effectuadas entras alzaments e sbassadas da material en dimensiuns giganticas. La bova prehistorica ha formau la cuntrada singulera dalla Ruinauta cun ses lags idillics da La Cauma e La Cresta. La bova ha denton era influenzau la formaziun dallas regiuns vischinas dalla Foppa (funs dil lag) e dalla Tumliasca e dalla Val Renana cun sias afflussiuns e ses sediments che han la finala era formau las Tumas da Domat e che furneschan oz il material allas cavas da gera da Rehanau e Panaduz. Els contuorns da Flem san ton la forza dall'aua sco la formaziun dils cuolms e dalla cuntrada vegnir demonstradas a moda exemplarica. Exempels persuerter ein ton la topografia che semida cuntinuadamein sil Plaun da Segnes sco era ils fenomenals mulins da glatsch ch'ei da catter ton sin

l'Alp Mora sco egl ual da Lavoi ed el Flem.

## In grond potenzial turistic

La formaziun dallas muntognas ch'ei visibile e che caracterisescha l'entira regiun dil patrimoni mundial ei in fenomen particular ed exemplaric per tut il mund. La varietad, la visibilitad e la genuinitad da quellas valurs naturalas ein singuleras ed ensiaran gest perquei era in grond potenzial turistic. Quei fatg ha lu era motivau la destinaziun turistica da Flem Laax Falera da focussar la signalisaziun turistica sil messadi «Regiun dil patrimoni mundial Sardona» che includa tut ils fenomenes descrites da quella cuntrada ch'ei vegnida influenzada e caracterisada entras la formaziun dalla ruttiva inversa dallas muntognas.

## Rezia cantat 2018: Varga 80 chors

L'Uniun cantunala da cant seprepara per Chiavenna

■ (anr/abc) **Dapi l'jamna vargada ha l'Uniun cantunala da cant dil Grischun (UCCG) ina nova presentaziun. Ella seprepara per la Fiasta cantunala da cant 2018.** Inagada ei quei il niev logo che duei mussar la diversitad dallas regiuns linguisticas, lu la diversitad dallas schlatteinas e dallas vegliadetgnas. UCCG plidentuots: giuven e vegl, seniors e juniors, tut tgi che vul astga cantar e separticipar. «Cantar da cuminonza sveglia las emozions» ei il motto dall'UCC. Sco quei che la presidenta e meina-gestiun dall'uniun cantunala, Lucretia Bärtsch, communitchescha han ins era renovau cumpleta-mein la pagina d'internet. «Ils chors grischuns sepresentan ussa da maniera surveivla e concentrau sigl'essenzial.» Silla pagina da beinvegni informescha l'uniun tetgala ch'ella colligi ils chors dil Grischun en tut sia diversitad culturala e linguistica.

Las paginas novas cuntengnan ina carta da survesta cun tut ils chors commembers. Denter auter dat ei ina rubrica cul calender da termin cuns concerts e cuors, in'otra cun informaziuns nizeivlas da cumponists grischuns. Sur la pagina d'internet nova dall'uniun cantunala www.buendner-choere.ch han ins era access sillas paginas dalla proxima Fiasta cantunala da cant dil Grischun. Per l'emprema gada ha quella liug egl'exteriur. Dils 8 tochen ils 10 da zercladur 2018 s'entaupan cantaduras e cantadurs a Chiavenna. Juniors e seniors, chors d'af-

fons, chors mischedai, virils, chors da vitgs, chors regiunalas, chors d'elita, chors da tuttas regiuns e tuts treis lungatgs sco era chors hospitonts dall'entira Svizra e digl'exteriur vulan esser dalla partida a Chiavenna. Il Cor viril Samedan ei responsabels per l'organisaziun da quella fiasta grischuna el marcauet al spartavias

denter Valsangiacomo e Bregaglia ed ils pass Spligia e Maloja. Daferton ein pli che 80 chors s'annunziai per la fiasta cul num «reziacantat2018». Aposta per quella fiasta ha Flavio Bundi, commember dalla cummissiun da musica dall'UCCG, cumponiu il himni da fiasta tenor il text dad Arnold Spescha. Tier igl act festiv vegnan

tuts, vul gir varga 2400 cantaduras e cantadurs, a cantar quella nova cumposiziun. Ella ei concepida aschia che tuts, independentamein dil lungatg e dalla vegliadetgna, san cantar quella canzun. Ina fuffernada ella pagina www.reziacantat2018.ch fa gust per la fiasta dalla proxima stad.



Chors gronds e pigns han ina finamira particulara pil 2018: La Fiasta cantunala da cant dils 8 tochen ils 10 da zercladur 2018 a Chiavenna.

## Ruschein, Ladir e Pigniu survegnan in niev plevon

■ (anr) Aschia san ins leger el Fegl ufficial dalla Surselva dall'jamna vargada – era sut Ruschein. Ruschein, Ladir e Pigniu survegnan in successur per sur Ignazi Pally d.p.m. Era il num dil niev plevon ei enconuschents. Cun l'entschatta da 2018 vegn sur Tomasz Arkuszewski a surprender las treis pleivs e prender dimora a Ruschein. El retuorna pia a pasturar en Surselva, essend gia staus in temps plevon-administratur a Tujetsch. Quella pleiv ha el midau lu cun surprender per cuort temps sco plevon administratur quella da Vaz-sut.

## Meglra protecziun per uffants

■ (rtr) Era persunal da canortas e trenaders da sport duessan en avegnir esser obligads dad annunziar a las autoritads sch'els han il suspect ch'in uffant vegnia maltractà. Enfin oz han sulettamain magistras e magisters u lavurers e lavurers socials gi l'obligaziun dad annunziar a la Kesb in suspect ch'in uffant vegnia maltractà. Il cussegl nazional ha ier decis da schlargiar il circl da persunas che duain esser obligadas dad annunziar a la Kesb sch'i dat indizis ch'in uffant vegn maltractà corporalmain, psichicmain u sexualmain. Dentant va l'affar sco emprim anc en il cussegl dals chantuns.